

Teroka maklumat dalam bidang persempadanan dan keselamatan perairan

Penyelidikan IPT boleh bantu Sabah

UM 11-12-13 84

Oleh HISYAMUDDIN AYUB
utusanabah@utusan.com.my

KOTA KINABALU 10 Dis. - Institusi pengajian tinggi (IPT) di negeri ini diseru membantu kerajaan dalam melakukan penyelidikan berhubung persempadanan dan keselamatan perairan Sabah.

Ketua Menteri, Datuk Seri Musa Aman berkata, saranan bernas yang dikemukakan oleh pihak pengajian tinggi agar usaha menjaga keselamatan di negeri ini dapat dipertingkatkan sebagai satu sumbangan besar kepada negara.

Katanya, penyelidikan dan maklumat daripada orang ramai menerusi kajian yang dijalankan tersebut mampu membantu kerajaan mencari jalan penyelesaian terbaik bagi memperkasakan lagi kawalan keselamatan di negeri ini khususnya.

"Sebagai contoh, Universiti Malaysia Sabah (UMS) boleh menyumbang kepada usaha kerajaan menjaga keselamatan di negeri ini me-

nerusi kajian dan penyelidikan yang dilakukan.

"Saranan bernas yang dilakukan oleh pihak universiti termasuk dalam aspek persempadanan akan dapat memantapkan lagi usaha menjaga kemakmuran negara, sekaligus mengelak berlakunya jenayah atau kejadian tidak diinginkan berulang," katanya ketika berucap merasmikan Seminar Keselamatan dan Ketenteraman Awam (Sekam) 2013 anjuran UMS di sini baru-baru ini.

Yang hadir sama Ketua Polis Negara, Tan Sri Khalid Abu Bakar; Peguam Negara, Tan Sri Abdul Gani Patail; Ketua Setiausaha Kementerian Dalam Negeri, Datuk Seri Abdul Rahim Mohamad Radzi dan Naib Canselor UMS, Prof. Datuk Dr. Mohd. Harun Abdullah.

Musa berkata, penganjuran seminar keselamatan dilihat mampu menghasilkan perbincangan dan perkongsian maklumat serta resolusi bermanfaat kepada negara.

Menurutnya, seminar seumpama

itu juga mampu memberi kefahaman serta pendedahan terbaik kepada para peserta terutama kepada golongan intelektual dan ahli majlis anak negeri berhubung kepentingan berganding bahu memastikan insiden serangan musuh yang berlaku di Pantai Timur Sabah tidak berulang.

"Malah, satu medan terbaik untuk masyarakat memperoleh ilmu berguna dan berganding bahu agar kejadian tidak diinginkan serta aktiviti jenayah dapat ditangani dengan berkesan," katanya.

Jelasnya, Sabah yang mempunyai kawasan pesisir pantai yang luas, malah meliputi hampir keseluruhan negeri dilihat tidak mampu dikawal sepenuhnya oleh pihak keselamatan negara.

Sehubungan itu katanya, kerjasama daripada semua pihak serta sumbangan rakyat untuk menjadi 'mata dan telinga' kepada pihak berkuasa sangat dihargai dalam memastikan kemakmuran di negeri ini terus berkekalan.



DR. MOHD. Harun Abdullah (dua dari kanan) menyampaikan cenderamata kepada Musa Aman sambil disaksikan Khalid Abu Bakar (kanan) dalam Seminar Keselamatan dan Ketenteraman Awam di Universiti Malaysia Sabah, Kota Kinabalu, baru-baru ini.